

Tarikh Dibaca: 23Jun 2017M | 28 Ramadhan 1438H

KHUTBAH JUMAAT

Tajuk:

***“BERHARI RAYA DENGAN PENUH
BERADAB”***

Terbitan:

Unit Khutbah

Bahagian Pengurusan Masjid

JABATAN AGAMA ISLAM SELANGOR



SENARAI AHLI JAWATANKUASA KHUTBAH NEGERI SELANGOR 2017

- 1. SS. Dato' Haji Haris Bin Kasim (Pengerusi)**
Pengarah Jabatan Agama Islam Selangor
- 2. SS. Dr. Haji Anhar Bin Haji Opir (Ahli)**
Timbalan Mufti, Jabatan Mufti Negeri Selangor
- 3. Tuan Haji Idris Bin Ramli (Setiausaha)**
Ketua Penolong Pengarah, Bahagian Pengurusan Masjid, JAIS
- 4. Yg. Berbahagia Dr. Haji Osman Bin Haji Sabran (Ahli)**
Pensyarah, Universiti Selangor
- 5. Dato' Haji Abdul Majid Bin Omar (Ahli)**
Ahli Jawatankuasa Fatwa Negeri Selangor
- 6. Tuan Haji Hamid Bin Md Isa (Ahli)**
Pensyarah, Kolej Universiti Islam Selangor
- 7. Tuan Haji Md. Sahari Bin Abdullah (Ahli)**
Ahli Jawatankuasa Fatwa Negeri Selangor
- 8. Tuan Haji Abdul Halem Hapiz Bin Salihin (Ahli)**
Ketua Penolong Mufti (Fatwa), Jabatan Mufti Negeri Selangor
- 9. Ustaz Muhammad Farhan Bin Wijaya (Ahli)**
Imam Besar Masjid Sultan Salahuddin Abdul Aziz Shah
- 10. Ustaz Indera Shahril Bin Mohd Shahid (Ahli)**
Pegawai Majlis Agama Islam Selangor
- 11. Ustaz Hairol Azmi Bin Khairudin (Urusetia)**
Penolong Pengarah Unit Khutbah, BPM, JAIS



“**BERHARI RAYA DENGAN PENUH BERADAB**”

الْحَمْدُ لِلَّهِ الْقَائِلِ: يَبْنِي ءَادَمَ خُذُوا زِينَتَكُمْ عِنْدَ كُلِّ
مَسْجِدٍ وَكُلُوا وَاشْرَبُوا وَلَا تُسْرِفُوا إِنَّهُ لَا يُحِبُّ
الْمُسْرِفِينَ ۝

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ وَأَشْهَدُ
أَنَّ مُحَمَّدًا عَبْدُهُ وَرَسُولُهُ. اَللّٰهُمَّ صَلِّ وَسَلِّمْ عَلَى
سَيِّدِنَا مُحَمَّدٍ وَعَلَىٰ ءَالِهِ وَأَصْحَابِهِ أَجْمَعِينَ. أَمَّا
بَعْدُ، فَيَا أَيُّهَا الْمُسْلِمُونَ! اتَّقُوا اللَّهَ، أَوْصِيكُمْ وَإِيَّايَ
بِتَقْوَى اللَّهِ فَقَدْ فَازَ الْمُتَّقُونَ. قَالَ اللَّهُ تَعَالَى: يَا أَيُّهَا
الَّذِينَ آمَنُوا اتَّقُوا اللَّهَ حَقَّ تُقَاتِهِ وَلَا تَمُوتُنَّ إِلَّا وَأَنْتُمْ
مُسْلِمُونَ.

Muslimin yang dirahmati Allah sekalian,

Marilah kita tingkatkan ketaqwaan kepada Allah SWT iaitu dengan mengerjakan segala perintah-Nya dan menjauhi segala larangan-Nya. Lebih-

¹ Al-A'raf : 31



lebih lagi di penghujung bulan Ramadhan ini, dan Syawal yang bakal menjelang. Kita hendaklah sentiasa berusaha dengan istiqamah untuk terus mengangkat kualiti iman dan amal soleh. Semoga kita mendapat keredhaan Allah SWT serta perlindungan daripada api neraka.

Tajuk khutbah kita hari ini ialah **"BERHARI RAYA DENGAN PENUH BERADAB"**.

Hadirin yang dirahmati Allah SWT sekalian,

Beberapa ketika lagi, Ramadhan al-Mubarak akan berlalu meninggalkan kita dengan seribu satu kenangan ibadah yang sepatutnya tidak terhenti apabila Syawal menjelma. Selagi nyawa dikandung badan, selagi urat nadi berdenyut, selagi malaikat maut belum menjemput, selagi itulah amal ibadat kita tidak sepatutnya terhenti hanya dalam musim-musim tertentu sahaja. Teruskan beribadah untuk sehari atau dua hari baki sepuluh hari terakhir Ramadhan, dan usah berhenti mengejar dan memburu lailatu al-Qadr yang lebih baik daripada seribu bulan.

Madrasah Ramadhan yang datangnya hanya sekali dalam setahun seharusnya dapat menjana peningkatan keimanan dan ketaqwaan kita kepada Allah SWT sebagaimana matlamat ini dinyatakan oleh Allah SWT dalam surah al-Baqarah ayat 183:

يَا أَيُّهَا الَّذِينَ ءَامَنُوا كُتِبَ عَلَيْكُمُ الصِّيَامُ كَمَا كُتِبَ
عَلَى الَّذِينَ مِن قَبْلِكُمْ لَعَلَّكُمْ تَتَّقُونَ ﴿١٨٣﴾



“Wahai orang-orang yang beriman! kamu diwajibkan berpuasa sebagaimana diwajibkan ke atas orang-orang yang dahulu daripada kamu, supaya kamu bertaqwa”.

Tetamu Jumaat yang dirahmati Allah sekalian,

Idulfitri yang akan kita sambut tidak lama lagi adalah anugerah Allah SWT kepada orang mukmin yang telah bersungguh-sungguh menunaikan ibadat puasa sepanjang Ramadhan. Ia adalah sebagai tanda kemenangan melawan segala tuntutan nafsu selama sebulan berpuasa.

Nabi Muhammad SAW menyambut Idulfitri dengan penuh kesyukuran lantaran nikmat yang dikurniakan Allah SWT. Kehadiran Idulfitri sewajarnya dihiasi dengan perkara-perkara sunat yang dapat meneruskan lagi kemuliaan Ramadhan. Antara perkara-perkara sunat yang sepatutnya kita lakukan sebelum solat sunat Idulfitri ialah:

Pertama: Mandi sunat hari raya sebelum keluar menunaikan solat sunat Idulfitri.

Kedua: Menjamah makanan sebelum keluar ke masjid.

Hadis daripada Anas Bin Malik R.Anhu yang memberitahu bahawa:

كَانَ رَسُولُ اللَّهِ صَلَّى اللَّهُ عَلَيْهِ وَسَلَّمَ لَا يَغْدُو
يَوْمَ الْفِطْرِ حَتَّى يَأْكُلَ تَمَرَاتٍ

“Rasulullah SAW tidak keluar rumah pada pagi hari raya Idulfitri melainkan selepas baginda SAW memakan beberapa biji tamar”

(Riwayat al-Bukhari).



Ketiga: Tidak melalui jalan yang sama ketika pergi dan balik ke tempat solat.

Ia berdasarkan hadis daripada Jabir R.Anhu yang menceritakan bahawa:

"Nabi SAW biasanya menukar atau berbeza jalan pergi dan pulang daripada masjid pada hari raya".

(Riwayat Al-Bukhari).

Keempat: Memakai pakaian yang paling baik dan berwangian.

Diriwayatkan daripada cucu baginda Saidina Hasan R.Anhu bahawa:

"Nabi SAW memerintahkan kami supaya memakai pakaian dan wangian yang paling baik yang kami miliki pada pagi hari raya".

(Riwayat al-Hakim).

Namun begitu, Islam melarang umatnya membazir dan melampaui batas dalam menyambut Idulfitri khususnya dari segi makanan, pakaian, perhiasan, termasuklah hiburan yang berlebihan dan lain-lain lagi.

Kelima: Memperbanyakkan bacaan al-Quran, berzikir, bertahmid dan bertahlil untuk memuji kebesaran Allah SWT.

Sunat melaungkan Takbir Hari Raya bermula Maghrib selepas terbenam matahari akhir Ramadhan dan tamat apabila hendak menunaikan solat sunat Idulfitri.

Hadirin yang dirahmati Allah sekalian,

Bulan Syawal juga boleh diibaratkan sebagai bulan silaturrahim. Betapa Syawal menjadi bulan yang penuh keberkatan kerana menerusi amalan ziarah-menaziarhi, umat Islam dapat mengeratkan hubungan silaturrahim. Ia mampu



menautkan kembali ikatan persaudaraan yang telah lama terputus. Banyak hikmah dan kelebihan yang diperolehi daripada amalan di bulan yang mulia ini.

Hadis daripada Anas bin Malik R.Anhu bahawa Rasulullah SAW bersabda:

مَنْ أَحَبَّ أَنْ يُبْسَطَ لَهُ فِي رِزْقِهِ وَيُنْسَأَ لَهُ فِي أَثَرِهِ
فَلْيَصِلْ رَحِمَهُ

"Sesiapa yang inginkan rezekinya diluaskan dan dipanjangkan usianya, maka jalinkanlah hubungan silaturrahim.

(Riwayat al-Bukhari).

Oleh itu, berkunjunglah ke rumah-rumah saudara mara termasuklah jiran tetangga dan yang paling afdalnya rumah yang paling dekat dengan rumah kita. Tinggalkan televisyen dan segala gajet serta media sosial agar kita boleh menghidupkan amalan berziarah dan menyambung silaturrahim sebagaimana yang dianjurkan oleh nabi SAW.

Muslimin yang dirahmati Allah sekalian,

Sedekah dan infaq juga perlu menghiasi agenda Syawal kita dengan tradisi memberi duit raya kepada kanak-kanak termasuk sanak saudara yang menambahkan lagi keceriaan dalam berhari raya.

Hadis daripada Salman B. Amir R.Anhu bahawa Rasulullah SAW bersabda yang bermaksud:

"Sedekah kepada golongan miskin, ganjarannya hanyalah sekadar pahala sedekah; sedangkan sedekah kepada mereka yang mempunyai hubungan silaturrahim terdapat dua ganjaran iaitu pahala sedekah dan pahala menjalin hubungan silaturrahim".



(Riwayat at-Tirmizi).

Muslimin yang dirahmati Allah sekalian,

Kelebihan dan keberkatan bulan Ramadhan ini perlu terus diraih dalam bulan Syawwal, di mana umat Islam dituntut untuk melaksanakan puasa sunat 6 hari dalam bulan Syawwal dengan ganjaran menyamai berpuasa sepanjang tahun.

Hadis daripada Abu Ayub al-Ansari R.Anhu bahawa Rasulullah SAW bersabda yang bermaksud:

"Sesiapa berpuasa pada bulan Ramadhan, lalu diiringi dengan puasa enam hari pada bulan Syawwal, dia seperti telah berpuasa sepanjang tahun.

(Riwayat Muslim).

Pada bulan Syawal nanti, umat Islam akan meraih ganjaran hebat menerusi ibadat puasa enam hari yang tidak ada pada mana-mana bulan yang lain.

Umat Islam juga diingatkan agar bersegera melaksanakan kewajipan membayar zakat fitrah sebelum luput masanya. Ia merupakan perintah Allah yang mesti ditunaikan bagi kepentingan dan maslahat golongan faqir miskin agar bergembira pada hari raya Idulfitri.

Di samping itu, umat Islam juga dilarang sama sekali untuk melibatkan diri dalam sebarang aktiviti yang memudharatkan seperti bermain mercun, dan hendaklah meninggalkan acara hiburan yang bertentangan dengan hukum syara'.

Hadirin sekalian,



Sebagai peringatan daripada khutbah hari ini, mimbar sekali lagi mengajak para Jemaah untuk:

1. Umat Islam hendaklah menyedari bahawa Idulfitri adalah ibadah dan bukannya mengikut dan memenuhi adat semata-mata.
2. Umat Islam hendaklah menyambut Idulfitri dengan penuh kesyukuran dan kesederhanaan mengikut syariat yang digariskan Islam, serta tidak keterlaluan dan membazir.
3. Umat Islam dianjurkan melaksanakan puasa sunat enam dalam bulan Syawal.
4. Umat Islam hendaklah menghulurkan tangan bermaaf-maafan terutamanya kepada ibu bapa, suami isteri, anak-anak dan sahabat handai serta ziarah-menziarahi mengikut batas-batas syarak.
5. Umat Islam hendaklah mengekalkan dan meneruskan segala amal soleh yang dilakukan dalam bulan Ramadhan seperti membaca al-Quran, solat sunat, dan bersedekah.

أَعُوذُ بِاللَّهِ مِنَ الشَّيْطَانِ الرَّجِيمِ
فَاذْكُرُونِي أَذْكُرْكُمْ وَاشْكُرُوا لِي وَلَا تَكْفُرُونِ

"Oleh itu ingatlah kamu kepada-Ku (dengan mematuhi hukum dan undang-undang-Ku), supaya Aku membalas kamu dengan kebaikan; dan bersyukurlah kamu kepada-Ku dan janganlah kamu kufur (akan nikmat-Ku)".

(al-Baqarah : 152).



بَارَكَ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي
وَإِيَّاكُمْ بِمَا فِيهِ مِنَ الْآيَاتِ وَالذِّكْرِ الْحَكِيمِ وَتَقَبَّلْ
مَنِّي وَمِنْكُمْ تِلَاوَتَهُ، إِنَّهُ هُوَ السَّمِيعُ الْعَلِيمُ.

أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ
وَلِسَائِرِ الْمُسْلِمِينَ وَالْمُسْلِمَاتِ، فَاسْتَغْفِرُوهُ إِنَّهُ هُوَ
الْغَفُورُ الرَّحِيمُ.



KHUTBAH KEDUA

الْحَمْدُ لِلَّهِ الَّذِي جَعَلَنَا مِنَ الْمُسْلِمِينَ، وَرَزَقَنَا مِنَ
الطَّيِّبَاتِ. أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ
لَهُ، وَأَشْهَدُ أَنَّ مُحَمَّدًا عَبْدُهُ وَرَسُولُهُ. اَللّٰهُمَّ صَلِّ
وَسَلِّمْ وَبَارِكْ عَلَى سَيِّدِنَا مُحَمَّدٍ وَعَلَى آلِهِ
وَصَحْبِهِ وَمَنْ تَبِعَهُمْ بِإِحْسَانٍ إِلَى يَوْمِ الدِّينِ. أَمَّا
بَعْدُ، فَيَا عِبَادَ اللَّهِ، اتَّقُوا اللَّهَ، أَوْصِيكُمْ وَإِيَّايَ
بِتَقْوَى اللَّهِ فَقَدْ فَازَ الْمُتَّقُونَ.

Sidang Jumaat yang dirahmati Allah SWT,

Mimbar Jumaat sekali lagi berpesan supaya kita sentiasa bertakwa kepada Allah SWT dan menyedari bahawa Islam mengajar kita supaya bersikap sederhana dalam segala amalan. Kita amatlah dituntut agar menampilkan kemuliaan akhlak, sikap dan keperibadian tinggi kerana Rasulullah SAW diutus untuk menyempurnakan akhlak dan sebagai rahmat bagi seluruh umat dan sekalian alam. Oleh itu marilah kita sentiasa memperbanyakkan solawat dan salam ke atas Nabi kita Muhammad SAW. Firman Allah SWT:



إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا.

اللَّهُمَّ صَلِّ وَسَلِّمْ عَلَى سَيِّدِنَا وَمَوْلَانَا مُحَمَّدٍ سَيِّدِ
الرُّسُلِينَ وَارْضَ اللَّهُمَّ عَنْ أَصْحَابِهِ وَقَرَابَتِهِ وَأَزْوَاجِهِ
وَذُرِّيَّاتِهِ أَجْمَعِينَ.

اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ
وَالْمُؤْمِنَاتِ الْأَحْيَاءِ مِنْهُمْ وَالْأَمْوَاتِ، إِنَّكَ سَمِيعٌ قَرِيبٌ
مُجِيبُ الدَّعَوَاتِ يَا قَاضِيَ الْحَاجَاتِ. اللَّهُمَّ إِنَّا
نَسْأَلُكَ وَنَتَوَسَّلُ إِلَيْكَ بِنَبِيِّكَ الْأَمِينِ، وَنَسْأَلُكَ
بِأَسْمَائِكَ الْحُسْنَى وَصِفَاتِكَ الْعُظْمَى أَنْ تَحْفَظَ
بِعَيْنِ عِنَايَتِكَ الرَّبَّانِيَّةَ وَبِحِفْظِ وَقَايَتِكَ الصِّمْدَانِيَّةَ،
جَلَالَةَ مَلِكِنَا الْمُعْظَمِ سُلْطَانَ سَلَاطُور، سُلْطَانَ
شَرَفُ الدِّينِ اأَدْرِيسِ شَاهِ الْحَاجِ ابْنِ الْمَرْحُومِ
سُلْطَانَ صَلَاحُ الدِّينِ عَبْدِ الْعَزِيزِ شَاهِ الْحَاجِ. اللَّهُمَّ



أَدِمِ الْعُونَ وَالْهِدَايَةَ وَالتَّوْفِيقَ، وَالصِّحَّةَ وَالسَّلَامَةَ
مِنْكَ، لَوْلِيَّ عَهْدٍ سَلَاطُورُ، تَغْكُو أَمِيرَ شَاهِ ابْنِ
السُّلْطَانِ شَرْفُ الدِّينِ اَدْرِيسِ شَاهِ الْحَاجِ فِي أَمْنٍ
وَصَلَاحٍ وَعَافِيَةٍ بِمَنْكَ وَكَرَمِكَ يَا ذَا الْجَلَالِ وَالْإِكْرَامِ.
اللَّهُمَّ أَطْلُ عُمْرَهُمَا مُصْلِحَيْنِ لِلْمُوظَّفَيْنِ وَالرَّعِيَّةِ
وَالْبِلَادِ، وَبَلِّغْ مَقَاصِدَهُمَا لِطَرِيقِ الْهُدَى وَالرَّشَادِ.

Ya Allah, Engkaulah Tuhan yang Maha berkuasa, kami bersyukur kehadrat-Mu yang telah mengurniakan kami rahmat dan nikmat, sehingga kami dapat meneruskan usaha ke arah memperkukuhkan negara umat Islam, sebagai negeri yang maju, sejahtera dan berkebakikan dibawah naungan dan pimpinan raja kami sebagai ketua agama Islam di negeri ini.

Justeru kami pohon kehadrat-Mu ya Allah, tetapkanlah iman dan pegangan kami kepada Ahli Sunnah Wal-Jamaah, terimalah amalan soleh kami, suburkanlah jiwa kami dengan budi pekerti yang mulia, satukanlah hati-hati kami, kurniakanlah kami rezeki yang luas lagi barakah, kayakanlah kami dengan ilmu yang bermanfaat, lindungilah kami daripada bala bencana dan peliharalah kami daripada ajaran sesat seperti Syiah, Qadyani, dan lain-lain ajaran yang difatwakan menyeleweng dari ajaran Islam atau bertentangan dengan pegangan Ahli Sunnah Wal Jamaah. Ya Allah bukannya hati kami untuk mendirikan solat fardhu lima waktu, menunaikan zakat melalui Lembaga Zakat Selangor, mewakaf dan menginfakkan harta melalui



Perbadanan Wakaf Selangor dan Tabung Amanah Pembangunan Islam Selangor.

رَبَّنَا هَبْ لَنَا مِنْ أَزْوَاجِنَا وَذُرِّيَّتِنَا قُرَّةَ أَعْيُنٍ
وَأَجْعَلْنَا لِلْمُتَّقِينَ إِمَامًا. رَبَّنَا ءَاتِنَا فِي الدُّنْيَا حَسَنَةً
وَفِي الْآخِرَةِ حَسَنَةً وَقِنَا عَذَابَ النَّارِ.

عِبَادَ اللَّهِ، إِنَّ اللَّهَ يَأْمُرُ بِالْعَدْلِ وَالْإِحْسَنِ وَإِيتَايِ
ذِي الْقُرْبَىٰ وَيَنْهَىٰ عَنِ الْفَحْشَاءِ وَالْمُنْكَرِ
وَالْبَغْيِ يَعِظُكُمْ لَعَلَّكُمْ تَذَكَّرُونَ ﴿٩٠﴾

فَاذْكُرُوا اللَّهَ الْعَظِيمَ يَذْكُرْكُمْ وَاشْكُرُوا لَهُ عَلَىٰ نِعَمِهِ
يَزِدْكُمْ، وَاسْأَلُوهُ مِنْ فَضْلِهِ ۖ يُعْطِيكُمْ وَلَذِكْرُ اللَّهِ
أَكْبَرُ وَاللَّهُ يَعْلَمُ مَا تَصْنَعُونَ.
